



Pa e kuater añanan benidero e skolnan na Hulanda Karibense lo haña sèn èkstra pa reklutá maestro. Ta trata di un suma total di 6 mion dòler (4,5 mion euro) te ku aña 2015. Esaki ministernan Van Bijsterveldt i sekretario di estado Zijlstra di Enseñansa a disidí.

Medidanan Èkstra

E sèn di e presupuesto di Zijlstra ta intenshoná pa hasi mas atraktivo pa maestronan di skol pa traha na Hulanda Karibense. Anteriormente OCW ya a pone 1,3 mion dòler strukturalmente disponibel pa drecha salario di maestronan na Hulanda Karibense. E sèn èkstra aki ta pa skolnan di enseñansa primario, sekundario i vokashonal medio.

Vakatura

Durante di su bishita na Boneiru, Saba i Sint Eustatius na 2011 minister Van Bijsterveldt a hañ'é konfrontá ku prekupashon tokante haltura di e salarionan di maestronan di skol i e problemanan ku skolnan ta konfrontá pa haña maestro pa duna lès na e skolnan. E skolnan na Hulanda Karibense tin relativamente hopi vakatura, ya ku hopi maestro ta bai despues di un temporada. E loke tin aktualmente na maestronan kalifiká riba merkado laboral no ta sufisiente pa yena tur vakatura ku tin.

Segun Van Bijsterveldt esaki ta un problema, pasó bon enseñansa ta enserá ku mester tin sufisiente maestro ku ta kalifiká. "Maestronan ta krusial pa kalidat di enseñansa i ta indispensable pa mehorá esaki. Pues e rekompensa pa nan trabou mester ta realístiko tambe. Di e forma aki nos ke hasi mas atraktivo pa maestronan pa duna lès na Hulanda Karibense", segun e mandatarionan.

Mas posibilidat pa skolnan

E punto di salida ta ku e skolnan mester buska maestronan kalifiká promé na Hulanda Karibense òf den region di Karibe mes. E skolnan a indiká ku esaki hopi biaha esaki no ta logra. Ora ku e skolnan purba di (temporalmente) reklutá maestronan for di Hulanda Oropeo, e maestronan aki ta spanta debí na e salario ku ta mas abou ku esun na Hulanda Oropeo i tambe e gastunan èkstra ku hopi biaha nan ta haña nan ta hasi. E maestronan tin ku muda i ta haña nan ku kondishonnan di labor nobo. Skolnan por usa e rekurso finansiero èkstra temporal ku ta keda pone disponibel, pa kompensá e maestronan. Por pensa riba sera e buraku ku tin den penshun i AOW, i tambe mehorá e kompensashon pa gastunan relashoná ku biahamentu i mudamentu. E skolnan ta liber pa usa e fondonan disponibel na nan mes noshon pa por kompensá e maestronan. Si tin nesidat e ministerio di OCW por yuda e skolnan yena a parti práktiko.